

0.0.1 papatitasuttaṃ

0. sāvattihinidānaṃ:

1. catūhi bhikkhave dhammehi asamannāgato imasmā dhammavinayā papatito'ti vuccati. katamehi catūhi?
2. ariyena bhikkhave sīlena asamannāgato imasmā dhammavinayā papatito'ti vuccati.
3. ariyena bhikkhave samādhinā asamannāgato imasmā dhammavinayā papatito'ti vuccati.
4. ariyāya bhikkhave paññāya asamannāgato imasmā dhammavinayā papatito'ti vuccati.
5. ariyāya bhikkhave vimuttiyā asamannāgato imasmā dhammavinayā papatito'ti vuccati.
6. imehi kho bhikkhave catūhi dhammehi asamannāgato imasmā dhammavinayā papatito'ti vuccati.
7. catūhi bhikkhave dhammehi samannāgato imasmā dhammavinayā appapatito'ti¹ vuccati. katamehi catūhi?

¹apapatito - syā, pts

8. ariyena bhikkhave sīlena samannāgato imasmā dhammavinayā appapatito'ti vuccati.

9. ariyena bhikkhave samādhinā samannāgato imasmā dhammavinayā appapatito'ti vuccati.

10. ariyāya bhikkhave paññāya samannāgato imasmā dhammavinayā appapatito'ti vuccati.

11. ariyāya bhikkhave vimuttiyā samannāgato imasmā dhammavinayā appapatito'ti vuccati.

12. imehi kho bhikkhave catūhi dhammehi samannāgato imasmā dhammavinayā appapatito'ti vuccatīti.

cutā patanti patitā,
giddhā ca punarāgatā;
kataṃ kiccaṃ rataṃ rammaṃ;
sukhenānvāgataṃ sukhaṃ'ti